

Parlamentario Mervin Wyatt-Ras:

Betico a trese cambio unda pe tur hende tabata igual

ORANJESTAD- Dia 25 di januari nos ta conmemora e fecha natalicio di nos Libertador Gilberto Françoise Croes (Betico Croes) q.e.p.d., kende tabata un luchado ferviente pa libertad di nos pueblo.

Betico a logra Status Aparte pa Aruba na aña 1986, dor di cual awe Aruba ta un ehempel pa otro paisnan chikito di tin autonomia y tambe ehempel e islanan den Reino cu na 2010 a logra haya nan Status Aparte.

Dor di nos Status Aparte Aruba a institui diferente entidad y organo manera Banco Central, nos sistema Huridico, nos Parlamento. Ademá nos por canta nos himno hisando nos bandera y nos por haci compras cu nos propio moneda. Aruba por a desaroya su economia y nos turismo manera e ta awe y nos por ta ariba mapa internacional.

Betico a trece cambio den e mentalidad di nod hendenan y su punto di salida tabata igualdad entre tur hende sea di campo/cunucu, sea pober of rico, sea hende

homer of hende muhe, sea di cualkier religion, rasa, y partido politico.

Como parlamentario Mervin ta gradici Betico pa tur loke ela nifica pa Parlamento di Aruba y como ehempel di un yiu di tera cu a logra hopi pa su pueblo saliendo for di su idealnan di igualdad pa un y tur, un democracia bibo y un comunidad caminda e hende ta central.

Lamentablemente Mervin ta constata cu e idealnan di Betico ta bayendo perdi y no ta ser carga dor di esunnan cu mester a sigui cu esaki y por constata cu en bes cu a boga pa e idealismo di Betico parlamentarionan di e partido MEP ta mas bien scoge e caminda di defende propio interes.

Esaki a sali na cla durante votacion aña pasa december 2011 ora a pasa e ley pa regla posicion di Parlamentarionan y Ministernan, e asina yama e “Versoberingswet” of ley di Austeridad. Aki e parlamentarionan mester a saca cara pa Betico pero lo contrario a sosode dor di 6 di

nan. Y mas peor ta cu ora tabatin Parlamentario manera Wyatt-Ras y Lopez-Tromp cu si a sigui e ideologia di Betico y partido MEP e tempo ey a wordo saka for di partido sin misericordia.

Mas ainda ora cu Parlamentario Wyatt-Ras y Lopez-Tromp menciona e hechonan aki den prensa pa informa pueblo, e reaccion di esunnan cu mester carga ideologia di nos libertador ta acusa Wyatt-Ras y Lopez-Tromp di ta yora.

Aki un biaha mas mustRANDO cu e politiconan aki ta mas leu ainda di e ideologia di nan partido.

Pesey mes Mervin ta di opinion cu ariba e fecha di natalicio di nos Libertador y den futuro nos mester refleha ariba e idealnan di Betico y educa nos futuro generacion cu ta importante pa nos tin un meta den bida, un ideologia pa logra y un vision pa un miho comunidad unda libertad y democracia ta reina pa un y tur.

En especial awor cu nos ta pasando den un situacion

financiero economico dificil ta importante pa bay bek na e raiz y mira kico nos por siña di tempo di Betico. Esta cu el a kere den idealnan y no den materialismo.

Ela kere den nos hendenan y nos capacidad y pa medio di “Nationbuilding” el a haci cu nos ta orguyoso di ta Arubiano y cu sea di unda cu nos ta bin of sea di unda nos ta naci, sea cuanto placa nos tin den nos cartera of cuanto material nos ta posee, of ki religion nos ta eherce, sea hende muhe, sea hende homber cu nos ta sinti orguyoso di ta pertenece na e pida baranca aki cu yama ARUBA.

Mervin Wyatt Ras ta spera cu gobierno lo sigui cu e proceso aki di NATIONBUILDING y stimula e amor patrio di nos hendenan pa asina crea tambe e “fighting spirit” pa defende nos pais. Logonan manera “I love Aruba” por yuda pero e mester ta parti di henter un programa di informacion, actividadnan y estimulacion, cuminsando for di nos muchanan chikito te adultonan y esunnan di

edad mayor.

Wyatt-Ras ta spera cu cada ciudadano por tuma tempo pa den famia recorda y conmemora e personahe importante aki pa pasado, presente y futuro di nos pais Aruba. □